



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM



O tsoma litsiane tsa Baotho

2


E khutlisetsa sechabeng

5



PEETE O LOANELA TŠIRELETSO EA BASOTHO

www.moeletsioabasothis.co.ls



Re se re fumaneha ho marangrang

Email: newsroom@moeletsioabasothis.co.ls
Tel: +266 28350466/ Whats app: 62600983

MOELETSI

Molemo o ja mong'a ona

Nakong ea khethollo ea merabe, batho ba bangata ba batšo ba Afrika Boroa ba ile ba balehela linaheng tse ling ho baleha mapolesa, chankana kapa ho koetlisoa ke ANC le PAC. Ho bile le linaha tse ka sehlohong tse ileng tsa ba amohela tse kenyeletsang Naha ea Lesotho, eo ka nako eo e ileng ea bitsoa 'Botšabelo' ba ANC. Maseru e ne e tletse litho tsa ANC tse balehileng. 'Musu oa Lesotho o ile oa beha bophelo ba oona kotsing ho ba sireletsa, leha Afrika Boroa e ne e hlasela ka makhetlo.

Ke linaha tse ngata tsa Afrika tse ileng tsa ema le bona nakong ea khethollo, hobane ke lumela hantle hore ntle le linaha tseo, ho ka be ho bile thata ho loantša khethollo. Ha se tsa Afrika feela linaha le tse kantle li ile tsa fana ka thuso. Ruri molemo o ja mong'a ona.

Hona joale ba lebetse thuso eo ba ileng ba e fumana nakong tseo tse thata, ba lelekisa merabe eohle hore e tsoe kahar'a naha ea habo bona. Re bona e ka bomalimabe bo teng ke hore bohloko ba batho ba Afrika Boroa ba ile ba tingoa monyetla oa ho ntlafatsa kelello tsa bona ka thuto. Ke ka hona ba se hloakang litsebo tsa mesebetsi, joale ba re ho nkoa mesebetsi ea bona, empa ho le lefifi feela ho bona.

Naha ea Afrika Boroa e mona moo e teng ke lipotomane tsa baholo ba rona. Joale haele mona Letona la Bosebetsi le kena lipakeng hore ba fumane lichelete tsa bona ke taba ea bohlokoa. Kannete sechaba se sotloa ka mabaka a sa utlahaleng, ba batloa hona le hoana ha ba tlameha ho fumana lichelete tsa bona tseo ba ba li sebelelitseng ka thata, ba li fufulelloa. Lipuisano ke ntho ea bohlokoa e se e ka li ka atleha, lipakeng tsa linaha tse sena tse peli ha eba le tharollo ea moshoelella.

Haele hantle Maseru ke Motse-Mohlo oa Lesotho, ka hona ha se phoso hore e be setereke se fapaneng le tse ling. Ha o kena kahar'a teropo ea Maseru, ho lokela ho bonahale hore o fihla sebakeng se seng. Ha re re lintlafatso li felle teng feela, empa litsela tse palamaneng li tla tliša tšobotsi e ikhethang.

Sechaba se phelang Maseru se t'lo fumana mesebetsi, Litsela tse na li t'lo fokotsa likotsi tsa mebeileng kahar'a teropo ea Maseru, le sechaba se t'lo bolokeha ha se tšela mebileng. Litsela tse na li t'lo kenyeletsa khaho ea marokho a mane kaofela. Re khothaletsa hore bohle ba filoeng mosebetsi oa ho phethisa morero, 'musu o ba lefa ka nako, e le hore le bona ba tsebe ho lefa basebetsi, e le ho qoba boipelaetso bo sa hlokeheng le hore mosebetsi o tsebe ho phethoa ka boitelo le bokhabane e le ho atlehisa morero ona.

E se e ka haele mona Motlatsi oa Tona-Khola a phethotse lekote, e be re tla bona lerole le qoba. Mebusong ea ho feta re ne re tseba fela hore ho tla luloa ho phetoloa lekote, e be ha ho nko ho tsoa lemina. Le tsona litsela tse na li ne li ahoa moeang mona feela hammoho le likolo tsa bo tsona.

Motsamaisi oa mehleng oa Lipuisano ka Ntlong ea Bakhethoa ba Sechaba, o betsitse khoba ka ho ngola buka e t'lo thusa Basotho ho utloisisa nalane ea bona le ho araba potso ea bohlokoa ea hore na sechaba se phela joang. O re pele a kena lipolotiking e ne le tichere, 'me ke hona moo a ileng a aha likamano le batsoali hore bana ba sebetse hantle sekolong. O re ha ho polotiki ntle le ho araba potso ea hore na re tla phela joang.

E mong oa barupeli ho tsoa ka NUL o boletes hore tšebetso ena e t'lo koala lekhalo le leholo la ho boloka nalane ea lipolotiki tsa Lesotho. Buka ena e fupere lintlha tsa bohlokoa haholo tsa bophelo ba mahaeng lilemong tsa bo-1940 le bo-1950, 'me e t'lo thusa Basotho haholo ho utloisisa puso ea sechaba ka sechaba le ho tobana le liphephetso tsa bokamoso.

Ho hopola masole a hlokahtseng ba ntse ba le mosebetsing ke taba ea bohlokoa, hona ho bontša tsotelo ho tsoa ho LDF, hore e feela masole ana a ne a ikanne ka tieo le 'nete ho sireletsa Naha ena ea Lesotho, ka boiphano, boitelo le botšephehi. Hona ho paka hore ene e le bahale ba 'nete.

MOLIMO A BOLOKE LESOTHO LE BASOTHO

Mokhosi o tsoma litsiane tsa Basotho

Nthabeleng Seithleko

Le hoja ho na le limilione tsa maloti tse hlalosoang li boloketsoe sebakeng sa bao e kileng ea e-ba basebetsi ba merafong Afrika Boroa

Paramente ea Lesotho e kopilo e sebelisana le Paramente ea Afrika Boroa ho batla mekhoa ea ho nolofatsa melao e sitisang Basotho ho fumana melemo eo ba e sebelelitseng.

Ka lehlakoreng le leng, Mookameli oa TEBA Lesotho, Kali Moeletsi, o re letsatsi le leng le le leng ba

leng se fokotsang chelete eo bajalefa ba qetellang ba e fumana.

Moeletsi o boetse a hlakisa hore TEBA ha se eona e liehisang litefo, empa tieho e bakoa ke lithoko tsa molao tse lokelang ho phethoa pele chelete e ka lefshoa.

Ka lilemo tse mashome, likete tsa Basotho li ile tsa



le malapa a bona, likete tsa Basotho li ntse li sitoa ho fumana litsiane ka lebaka la likhoqetsane tsa molao le tsamaiso tse ba qobellang ho batla litokomane Afrika Boroa. Tseno li boletsoe ke Letona la Khirele Bosebetsi Mohlomphehi Ts'eliso Mokhosi, 'mokeng oa boithathobole le boikarabello ka la 1 Phupu monongoaha.

O itse Lekala la Basebetsi le tseba ka chelete e ntseng e kolotoa bao e kileng ea ba basebetsi ba merafong le bajalefa ba bona, empa litlhoko tsa molao li ntse li liehisa tefo ea eona.

Mokhosi o re e 'ngoe ea litšitiso tse kholo ke hore mangolo a bohlokoa a bajalefa a fumaneha feela Ofising ea 'Master of the High Court' Afrika Boroa. Sena se qobella Basotho ba bangata, haholo ba tsoang libakeng tse hole, ho kena litšenyehelong tse kholo kapa ho hloleha ho phethela likopo tsa bona.

O itse 'musu o se o qalile lipuisano le likampani tse 51 tse amehang ho ntlafatsa litefo tse sena. Ho fihlela hajoale, ke Tshiamiso Trust feela e lumetseng ho bula ofisi Lesotho ho thusa bao e kileng ea ba basebetsi ba merafong ho kenya le ho phethela likopo tsa bona.

Letona le boetse la re

amohela batho ba tsoang libakeng tse hole ba batla thuso, empa ba sitoa ho tsoela pele hobane ba haelloa ke litokomane tse tsoang Afrika Boroa.

O re sena se qobella ba bang ho sebelisa baemeli ba ikemetseng ba ba lefisang chelete e ngata bakeng sa ho sebetisa likopo, e

sebetisa merafong ea Afrika Boroa, moo li ileng tsa kenya letsoho meputsong ea penshene, 'provident fund' le matšelisano. Le hoja ba bang ba se ba une molemo, likete tse ling 'moho le malapa a basebetsi ba seng ba hloka hahala ba ntse ba emetse chelete eo ba e kolotoang

Mazenod PRINTING WORKS (Pty) Ltd

57396597
28 350 81528 350 466
lesaoanat@gmail.com



Malebela

Ts'eliso Mokhosi



Scan me

U se u ka fumana buka ea Malebela ho marang-rang a boletsoeng ka tlase kapa oa sebelisa code e kaholimo.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>



Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO

A LOKHETSE MORENA SECHABA SE PHETHEHLING (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seithleko

Tšelisano Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

'Muso o ntlafatsa phano ea litšebeletso



Nthabeleng Seitlheko

Motlatsi oa Tona-Kholo Justice Nthomeng Majara, o re 'muso o ikemiselitse ho matlafatsa boetapele, boikarabello le phano ea litšebeletso tsa sechaba kamor'a ho tsoaroa ha Seboka sa pele

sa Naha sa Baetapele se neng se tsoaretsoe Berea. H'a fana ka tlaleho ea liqeto tsa seboka sena, ka la 29 Phupjane monongoaha o itse se ne se kopantse matona, litho tsa paramente, lihlooho tsa mekhatlo e ikemetseng, bangoli ba ka sehloohong ba mafapha, Babusi ba Litereke, mekhatlo ea 'muso hammoho le baemeli ba linaha tse ling, ka sepheo sa ho matlafat-

sa tšebelisoano-'moho le ho potlakisa tšebetso ea merero ea ntšetsopele e tlas'a Leano la Bobeli la Naha la Ntšetsopele (NSDP II). 'Muso o amohetse hore o ntse o tobane le mathata a kenyeletsang tlhokahalo ea mesebetsi har'a bacha, khaello ea lijo, bana ba tlhelang sekolo, khaello ea meaho, ho se kene tšebetsong ha merero, pokello e tlaase ea lekhetho, bob-

olu, tšebelisoano e fokolang lipakeng tsa mekhatlo ea 'muso le tlaleho e sa khotsofatseng mabapi le tšebetso ea 'muso.

Majara o boetse a re seboka se ananetse karolo e bapaloang ke liitsi tse ikemetseng tse kang CEO, Ofisi ea Monamoli le Mohlahlobi e Moholo oa Libuka tsa 'Muso ho loantša bobolu, ho matlafatsa toka le ho sireletsa thepa ea sechaba. O re mekhatlo ena e hloka ho tšehetsoa ka lichelete le ho matlafatsa bokhoni ba eona, e le hore e tsebe ho phetha mesebetsi ea ka katleho.

Majara o re baetapele ba lumellane hore litšebeletso tsa sechaba li lokela ho beha Basotho pele, ho sebeletsa pepeneneng, ho matlafatsa tšebelisoano-'moho, ho khotlaetsa boqapi le ho netefatsa hore maano a 'muso a hlahisa liphetho tse bonahalang bophelong ba batho.

Har'a liqeto tse nkiloeng ke ho atolosa merero ea noesetso, ho tšehetsa likhoebo tse nyenyane le tse mahareng, ho ntlafatsa litšebeletso tsa bophelo bo

botle, ho matlafatsa thuto ea mesebetsi ea matsoho, ho atolosa litšebeletso tsa marang-rang, ho ntlafatsa mananeo a tšireletso ea sechaba le ho holisa khaho ea litsela, motlakase, metsi le marang-rang.

O boetse a phatlalatsa hore ho tla thehoa Lekala la Tlhokomelo ea Tšebetso ka Ofising ea Tona-Kholo le tla sala morao tšebetsong ea liqeto tsa seboka. Mafapha ohle a 'muso a laetsoe ho lokisa meralo e hlakileng ea tšebetso, ho aba boikarabello le ho fana ka litlaleho tsa tsoelo-pele khafetsa.

Majara o re matsatsi a pele a 90 kamor'a seboka sena a tla ba bohlokoa haholo ho qala tšebetsong ea liqeto, athe nakong ea likhoeli tse 12 tse tlang Basotho ba lokela ho qala ho bona liphetho tse hlakileng litšebeletsong tsa sechaba le ntšetsopeleng ea naha.

Qetellong o ipilelitse ho litsi tsohle tsa 'muso hore li sebetse ka potlako, pepeneneng le ka boikarabello ho netefatsa hore Basotho ba fumana litholoana tse bonahalang mesebetsing ea 'muso.

LDF e hlomphe masole

Nthabeleng Seitlheko

Sesole sa Lesotho (LDF) se tšoare tšebeletso ea thapelo mabintleng a masole Khutsong, Ratjose Barracks, ho hopola le ho hlomphe masole a ileng a lahlehela ke bophelo h'a ntse a sebeletsa naha. Tse-na li bile a la 30 Phupjane monongoaha.

Moketeng ona ho bile teng baetapele ba 'muso, baetapele ba sesole hammoho le malapa a masole a seng a hlokahetse. O kenyelelitse ho beoa ha meqhaka ea lipalesa, lithapelo le lipuo tsa khopotso tse hlomphang boitelo ba banna le basali ba ileng ba tela bophelo ba bona molemong oa Naha ea Lesotho.

H'a bua lebitsong la Lekala la Tšireletso, Mongoli e Moholo Mpopo Tšoele o itse sechaba se na le boikarabelo ba ho hopola bahale ba sona, a hlokomelisa hore naha e sa hlomphe ba ileng ba e sebeletsa e ka lahlehela ke metho ea eona ea boitšoarole le seriti.

O boletse hore masole a seng a hlokahetse e ne e le

mokokotlo oa tšireletso ea naha. A boela a phaphatha karolo eo LDF e e bapalang ho boloka khotso le botsitso Lesotho, a tiisa boitlamo ba 'muso ba ho netefatsa hore sesole se fumana lisebelisoa tse lekaneng, ho kenyeletsa thepa ea sesole, lijo le seaparo.

Tšoele o boetse o khotalelitse tšebelisoano-'moho lipakeng tsa boetapele ba sesole le mekhatlo ea 'muso, e le ho matlafatsa sepheo sena le ho tsebisa sechaba ka karolo ea LDF ho sireletsa naha.

Molaoli oa LDF Lieutenant General Mojalefa Letsoela, o itse letsatsi la khopotso ke nako ea ho hlomphe masole ohle a ileng a lahlehela ke bophelo a ntse a

phetha mosebetsi oa ona, ho kenyeletsa le ba ileng ba ameha liketsahalong tsa tšireletso ea naha, haholo-holo ketsahalo ea letamong la Katse ea selemo sa 1998, eo a reng ke karolo ea nalane e bohloko ea sesole.

O boletse hore selemong sena ho hopoloa masole a 16, a emelang boitelo, sebetse le boinehelo ba masole ohle a ileng a hlokahala a le mosebetsing.

Letsoela o boetse a re lilemong tse fetileng Letsatsi la Sesole le ne le ketekoa ka mekoloko, lipontšo tsa sesole, lipapali le liketsahalo tse neng li tšoareloa Lebaleng la Lipapali la Setsoto. Leha ho le joalo, o itse litloaelo tseo li ile tsa emisoa



ka lebaka la mathata a fapakaneng, 'me hona joale mokete o tsepamisitse maitutlo haholo ho hopoleng ba hlokahetseng ba sebeletsa naha.

O ile a boela a bua ka liketsahalo tse bohloko tsa la 22 Loetse 1998, a re e ntse e le karolo ea mohopolo oa sesole, 'me li tsoela pele ho matlafatsa boitlamo ba sona, bonngoe, khotso le tšebeletso ea sechaba.

Mookameli oa Basebetisi ba Sesole Major General Ramanka Mokaloba o itse LDF ebile le karolo ea bohlokoa nalaneng ea ntšetsopele ea Lesotho le tšebelisoano le mabotho a linaha tsa tikoloho. O boetse a bua ka linako tseo naha e ileng ea tobana le merusu ea lipolotiki, ho kenyeletsa le liketsahalo tsa 1998. A re li bontša bohlokoa ba ho matlafatsa tsamaiso ea tšireletso le ho tšehetsa se-

sole ka ho lekaneng.

H'a bua lebitsong la malapa a masole a hlokahetseng, Sekhoane Motseki o ile a leboha LDF ka ho tsoela pele ho hopola le ho mema malapa ketsahalong ena. A re ba ananela haholo hore boitelo ba baratua ba bona bo ntse bo hlompheua.

Sesole sa Lesotho se keteka Letsatsi la Sesole selemo le selemo ka la 30 Phupjane, ho hlomphe masole a hlokahetseng a le mosebetsing, le ho hopola nalane ea sesole hammoho le karolo eo se e bapalang ho boloka khotso le tšireletso ea naha.



The Office of **TJ General Dealer (Pty)Ltd** Reg.Number 56709 writes to inform shareholders and the public at large of its decision to move its registered addresses with effect from the **16th June 2026**.
Old address Caldon road P.O. Box 223 Butha-Butha 400 Lesotho
New address Sir Seretse Khama Road Ha 'Mathata P.O. Box 567 Maputsoe 350

MOELETSI O TŠEHETSA BACHA

Tšeliso Thakholi

E mong oa bacha ba Ha Letsoela, Bela-Bela, ba ikopantseng ho theha sehlopha se etsang lihlahisoa tse fapakaneng tsa sesepa ka lero la lamunu se bitsoang Hloahaleri Letsoela Nutrition Club (HLNC), abuti Mentšele Sefoboko, o khothaletsa bacha ho se itheke moroalo ntlheng ea ho qala likhoebo, kaha Naha ea Lesotho e tobane le leqeme le leholo la mesebetsi. Bacha bana ba seng ba hatetse pele haholo boikopanyong ba bona, ba hlokometse hore ha ho seo bacha ba ka intšang bofumeng ka sona haese ka boikopanyo ho iqalla likhoebo tse fapakaneng.

O hlokomelisa bacha hore ho qala khoebo ho hloka feela boitšepo le lerato la seo motho a se etsang. Ntlha e 'ngoe ea bohlokoa eo a e toboketsang ke ea hore bacha ha ba ikopantse ba lokela ho ikemisetsa ho tobana le liphephetso tsa likhoebo tsa bona, eleng se tla ba thusa ho tsitlallela khoebong, kaha ho tlisa katleho ea khoebo e leng sona se ahang motho bophelo bohle ba hae. Sefoboko ke e mong oa bo-rakhoebobantseng ba le banyenyane lilimong, ba nang le lerato le tebileng la khoebo.

LERATO LA KHOEBO

Hantle ke ithutile hore motho ka mong bophelong o na le ntho eo a e ratang, eo a ka fetolang bophelo ba hae ka eona. Ntho eo u e ratang u tliil'o e tseba ha u le kahar'a eona. Ke qalile ka ho ba le lerato la khoebo le ho itšoarela ka matsoho ha ke le sekolong, moo ke neng ke kopanya bacha ho theha mekhatlo ea boitjaro. Taba ena ka e fetisetsa motseng oa heso hore re ithehele mekhatlo, e tla re thusa hore re itšoarele ka matsoho ho itlhahisetsa mesebetsi. Ka hlokomela hore boikopanyo ke taba ea bohlokoa haholo, ke ha re tla ikopanya re le bacha, che le hoja batho ba baholo ba ntse ba le teng, bao e leng litho tsa rona, re sebetsa 'moho le bona ho holisa sehlopha sa rona sa Letsoela Nutrition Club.



QALONG

Ha re qala re ne re sena litsebo tse lekaneng haholo tsa ho hlahisa sesepa ka lero la lamunu le ho boloka lijo tsa mefuta ka libotlolong. Empa ka lebaka la lerato la ho itšoarela ka matsoho le ho itlhahisetsa mesebetsi, re ile ra ntšetsa litsebo tsa rona pele, ka ho hlahlelloa ka litsebo ke Mokhatlo oa World Vision Lesotho. Re le bacha ba Bela-Bela re rata ho leboha World Vision ka mokhoa o khethehileng, ka ho re fa lithupelo kaha kajeno re tseba ho itlhahisetsa mekhoha ea boipheliso. Ke re le kajeno e ntse e re tšehelitse ho bona hore re ba le bokamoso bo chabileng.

LIHLAHISOA

Re etsa sesepa sa boemo bo holimo haholo; sesepa se hlapang, se bitsoang Hlasela Multi-purpose, sesepa se hlatsoang lijana sa Hlasela, sesepa se bo-laeang likokoana-hloko sa Hlasela. Mefuta ea sesepa sa rona re e bitsa Hlasela hobane ha se etse mosebetsi o leng mong, empa se etsa mesebetsi e mengata e fapakaneng bakeng sa bophelo bo botle.

Re hlahisa tsa boima bo fapakaneng e leng ba 20litres, 750ml, 5litres le 2litres. Re se etsa ka mebala e fapakaneng. Tseno tsohle ke ka thuso le tataiso ea World Vision. Ho feta mona re boetse re boloka lijo tse kang mokopu, chillis, tamati le meroho ka mefuta. Re pheha jeme ea liperekisi re

betla le mangangajane. Lihlahisoa tsena tsa rona leha e le tsa boleng li fumaneha ka litheko tse tlaase haholo.

'MARAKA

Ha joale boholo ba 'maraka oa rona bo motseng oa habo rona le litoropong tse haufi. Sechaba sa habo rona se re tšehelitse haholo ho reka lihlahisoa tsa rona. Re li rekisa toropong le motseng. Re mothating oa ho tla sebeletsa hore li fumanehe kahar'a mabenkele a maholo a Naha ea Lesotho. Re ne re ntse re sokolisoa ke ntho e bitsoang 'barcode', eleng linomoro tse mona tseo e reng ha motho a li kenya mochining o rekisang li bontša hore sehlahisoa ka seng theko ea sona ke bokae. Re se re hatetse

pele haholo ho e fumana.

KHOLO EA KHOEBO

Ho fihlela hajoale khoebo ea rona e hola ka potlako e kholo, hoo batho ba bang ba bahoebi ba re khothaletsang hore sehlopha sena sa rona re se ngolise e se e le mokhatlo, e le hore re tle re tsebe ho ngolisoa ka molao le ho o fetola koporasi. Empa re sa ntse re batla hore sehlopha sena se hole ho feta mona pele re ka etsa tsohle. Hoba re lakatsa ho bona lihlahisoa tsa rona li se li fumaneha hohle kahare le kantle ho naha. Hona joale re kholisana kamor'a likhoeli tse tharo ha re entse phaello, eleng ea tse ling tsa likatleho tse kholo. Re batla ho bona mabenkeleng a maholo e le lihlahisoa tsa rona feela.

BOELETSI HO BACHA

Ke khothaletsa bacha ho qoba ho lula fatše ba sa etse letho, ba lla ka 'muso ka hore ha o tlhahiso ea mesebetsi, empa ba ka ithehela mekhatlo eo baka qalang pele ka lipoloko le likalimo tsa lichelete. E re ha ba se ba bokelelitse, ba be ba khoaolla litsebo tsa bona tse fapakaneng ho ithehela likhoebo tseo ba tla tseba ho iphelisa ka tsona. Tlohellang hore na mang o tla reng ho ba ke lona le tsebang seo le se batlang ka lipelong tsa lona. Qobang ho lula feela ho se letho leo le le etsang, kaha seo se ka le kenyetsa metsi ka moeli. Rona re qalile likhoebo tse-na tsa rona ka M4,000.00, eo re neng re ile ra e bokeletsa ea re ha re qeta ra qala likhoebo tsa rona.



Motanyane o ngola buka


Nthabeleng Seithleko

Motsa m a i s i oa mehlang oa Lipuisano Ntlong ea Bakhethoa ba Sechaba, Mohlomphehi Sephiri Motanyane, o re buka ea hae e ncha, 'Lesotho Politics and Society', e ngotsoe ho thusa Basotho ho utloisisa nalane ea bona le ho araba potso ea bohlokoa ea hore na sechaba se lokela ho phela joang. O buile tsena ka la 29 Phupjane monongoaha.

Buka ena e thakhotsoe ka tlasa sehlooho se reng "Ho ngola nalane ea nako e fetileng, ho ruta nako ea hona joale le ho susumetsa bokamoso".

Motanyane o itse pele e ba ralipolotiki e ne e le tichere. O re mosebetsi oa hae oa botichere o ile oa mo thusa ho aha likamano tse ntle le batsoali, kaha o ne a netefatsa hore bana ba sebetsa hantle sekolong, a bile a etela malapa ha ngoana a sa ee sekolong ntle le lebaka.

O re likamano tseo li ile tsa mo fa sebete sa ho kena lipolotiking. "Ha ho lipolotiki



ntle le ho araba potso ea hore na re tla phela joang," ho boletse Motanyane. O hopotse hore nakong eo a neng a kena lipolotiking ho ne hona le Ntoa ea Mantsoe hoo a ileng a haneloa le ho kena Afrika Boroa.

O re o ithutile ho hlompha bahanyetsi ba hae ba lipolotiki, le ho ananela boetapele ba Mofu Dr. Ntsu Mokhehle,

eo a reng h'a ne a romela bana sekolong o ne a sa khetholle ka mebala ea lipolotiki.

Motanyane o supile hore bana ba lokela ho ruta ho araba potso ea bophelo ka botšephehi le ka seriti. O boetse a re h'a qala ho kenella lipolotiking o ile a buisana le baholo ba sechaba hore ba thehe mokha oa lipolotiki o

tla rarolla mathata a Basotho. Komiti e ile ea thehoa, 'me eena ea e-ba mongoli oa pele.

A khothaletsa Basotho ho ruta bana ho utloisisa phapano pakeng tsa lipolotiki le likarolo tse ling tsa bophelo. O itse lipolotiki li mo rutile ho ananela motho e mong le e mong, ho sa tsotellehe maemo a hae kapa thuto eo a nang le eona.

Prof. Motlatsi Thabane ea tsebahalang e le sengoli le morupeli Sekolong se Seholo sa Sechaba (NUL), h'a bua ka buka ena o itse e koala lekhalo le lehlo la ho boloka nalane ea lipolotiki tsa Lesotho. O bontšitse matšoenyeha ka bofokoli ba ho boloka litlaleho naheng ea Lesotho, a re leha Lesotho le na le mehlopi e mengata ea nalane, ho thata ho e fumana.

O itse Lefapheng la Litlaleho tsa Naha litlaleho tse fumanehang habonolo li fella ka selemo sa 1963, athe 'muso o hloehile ho isa litokomane tsa bohlokoa moo joalokaha o lokela.

Thabane o itse bofokoli bona bo sitisa lipatlisiso le ho ngoloa ha nalane. O ile a fana ka mohlala oa Thaba-Bosiu Rural Devel-

opment Programme, eo a reng litokomane tsa eona ha li fumanehe hantle, e leng se etsang hore karolo ea bohlokoa ea nalane ea naha e lahlehe.

O boetse a re Lesotho le lahlehetsoe ke menyetla ea ho ngola nalane ea baetapele ba kang Mofu Leabua Jonathan le Mofu Ntsu Mokhehle. Ka hona, o ipilelitse ho 'muso le paramente ho aba lichelete bakeng sa ho ngoloa ha libuka tsa bophelo ba matona le litona -khohlo tsa mehlang hore e be lefa la meloko e tlang.

Thabane o boetse a re buka ea Mohlomphehi Motanyane e na le lintlha tsa bohlokoa haholo, haholo-holo ka bophelo ba ma-haeng lilemong tsa bo-1940 le bo-1950, tseo a reng li ntse li nyamela butle-butle.

A boela a totobatsa bohlokoa ba ho ngola ka puo ea Sesotho, a re kamor'a boipuso Basotho ba ile ba fokotsa moetlo oa ho ngola ka Sesotho, hoo kajeno ho seng bonolo hore batho ba bangata ba utloisise lingoloa tsa Sesotho.

Lehlakoreng le leng Lieutenant oa Bobeli Bothata Silase o itse boetapele bo

atlehileng bo hloka pono e telele, moralo oa nako e telele le ho boloka tsebo ka lingoliloeng hore lichaba li tsebe ho hlola mathata a puso ea sechaba ka sechaba le ho fihlela ntšetsopele.

O itse baetapele ba lokela ho ba le bokhoni ba ho bona likotsi le mathata pele li hlaha, e le hore ba li fetole menyetla ea khotso le tsoelo-pele. A ipapisitse le lithuto tsa setsebi sa maa-no sa Machaena, Sun Tzu, bukeng ea 'The Art of War', o itse baetapele ba atlehang ba itokisetsa mathata pele a hlaha, eseng ho emela hore a be teng.

O boetse a supa China e le mohlala oa naha e ileng ea sebelisa moralo oa nako e telele ho tloha lilemong tsa bo-1980 ho fihlela e e-ba e 'ngoe ea linaha tse eteletseng pele moruong le-fatšeng.

Lt. Silase o khothalelitse Basotho le Ma-Afrika ka kakaretso ho amohela moetlo oa ho rala bokamoso ba nako e telele, ho ngola nalane le ho boloka tsebo e tla tataisa meloko e tlang.

O re buka ea 'Lesotho Politics and Society' e tla ba mohloli oa bohlokoa oa tsebo o tla thusa Basotho ho utloisisa puso ea sechaba ka sechaba le ho tobana le liphephetso tsa bokamoso.

Liberty e khutlisetsa sechabeng

Nthabeleng Seithleko

Mookameli oa Litsi tsa Tlhabollo ea Batšoarua, Matingoa Phamotse, o re ho haella ha tsebo ea ho laola litaba tsa lichelete, ho etsa hore bahlanka ba bangata ba kenelle litumellanong tsa lichelete le 'li-insurance' tseo ba sa li utloiseng hantle, e leng se qetellang se ba kenya likoloteng le mathateng a lichelete.

O buile sena nakong Liberty Life Lesotho, e neng e abela setsi sena chelete pampiri eo eleng karolo ea phaello e hlalisoang ke hore bahlanka ba setsi se joalo ba nke botho ba 'insurance'. Tsena li bile ka la 30 Phupjane monongoaha.

A re ho tloaelehile hore batho ba se bale kapa ba se ke ba hlalose tsoa ka botlalo pele ba tekana litokomane. O itse ba qetellang ba e-na le 'li-insurance' tse ngata ntle le ho tseba melemo kapa boikarabelo bo tsa-maeng le tsona.

Phamotse o bile a hlalosa pale ea hae, moo a itseng le eena o kile a tekanela 'insurance' ea M36.00 a sa utloi-

sise hantle litaba tsa eona, 'me a iphumana a lahlehetsoe ke chelete ntle le ho rua molemo, kaha chelete eo e ne e utloa makhetho a 'maloa 'me a iphumana a tsoa a sena chelete.

O re mathata a lichelete a ama bophelo ba motho ka kakaretso, a baka likhohlano malapeng, karohanano ea malapa, khatello ea maikutlo, mafu a amanang le khatello ea maikutlo le kelello, le ho fokotsa tlhahiso mosebetsing. A re ha batho ba se na tsebo ea ho sebelisa chelete hantle, ba bang ba qetella ba kenella

litlolong tsa molao, kapa ba alima chelete e ngata eo ba sa khoneng ho e lefa.

O boletse hore thuto ena e tla thusa bahlanka ho etsa liqeto tse nepahetseng tsa lichelete, ho utloisisa lihlahisoa tsa 'insurance' pele ba li tekanela, ho itšireletsa likotsing tsa bophelo le ho rera bokamoso ba malapa a bona.

Mookameli oa Liberty Life Lesotho, Makhakhe Maliehe o hlalositse hore morero ke ho matlafatsa tsebo ea lichelete har'a bahlanka ba sechaba, ho ba thusa ho etsa liqeto tse nepahetseng

mabapi le poloko, matsete le 'insurance', e le ho aha malapa a sireletsehileng le sechaba se phelang hantle.

A re 'insurance' ena e tla thusa ho fokotsa sekhahla sa likoloto, ho ntlafatsa boiketlo ba bahlanka le ho matlafatsa botsitso ba malapa a Basotho.

k'ampani e ne e se e lefile likopo tsa melemo tse ka bang M1Bilione, ha e ntse e bokelletse tse ka bang M134, 000.00, tlas'a sehlahisoa sa 'Funeral Scheme' se reretsoeng bahlanka ba Litsi tsa Tlhabollo ea Batšoarua.



Maseru e tla khaba

Nthabeleng Seitlheko

Kamor'a lilemo tsa lipuisano, likhang le ho nyatsua ha morero ha o ne o hlalisoa ke puso e fetileng, e neng e etelletsoepele ke Tona-kholo ea Mehlang, Dr. Moeketsi Majoro, 'muso o phethotse lakote la khaho ea litsela tse palamaneng Mpilo Boulevard ka la 29 Phupjane monongoaha.

Morero oa Mpilo o arotsoe ka libaka tse fapakaneng tse kenyeletsang Maseru Club, Pioneer Mall, IEMS le Katlehong, har'a tse ling. Sepheo sa ona se sehlo ke ho fokotsa likotsi tsa

mebileng kahar'a toropo ea Maseru.

Morero o etelletsoe pele ke Nam Consultant ka tšebeliso le likampani tse ling tsa boahelani, ho kenyeletsa Sinohydro ea 'Republic' ea Batho ba China. Morero ona o tla akaretsa khaho ea tsela e bolelele ba likilomithara tse robong le marokho a mane.

Motlatsi oa Tona-Kholo ea tšoereng molepo e le Tona-kholo, Justice Nthomeng Majara, o etelletse pele thakholo ea mosebetsi ona. Puong ea hae ea sehlooho, eo hape e leng Setho sa Paramente sa Maseru Central, o boletse hore khahong ea marokho ho tsetetsoe

chelete e fetang M230 Mlilione, ha khaho ea litsela eona e fuoe chelete e fetang M280Millione. O boetse a re baahi ba Old Europa, Katlehong le ba lulang haufi le Pope John Paul ba tla una molemo haholo morerong ona.

O laetse borakonteraka ho phetha mosebetsi oa bona ka botsebi le ho o qeta nakong e behiloeng, a boela a laela Lekala la Puso ea Libaka ho etsa bonnete ba hore borakonteraka ba lefshoa ka nako.

O ile a boela a ipiletsa ho Basotho ba tla fumana mesebetsi morerong ona hore ba ananele menyetla eo ba e fuoang, ba sebetse

ka boitelo le bokhabane e le ho qoba mathata a ka sitisang katleho ea morero.

Ka lehlakoreng le leng, Letona la Puso ea Libaka le Borena, Mohlomphehi Nkhethoa Seetsa, o itse seo ke mohato oa bohlokoa ntlafalolong ea phano ea litšebelsetso, kaha morero oo ebile khale o letetsoe ke sechaba.

O re litsela le marokho tse tla ahoa li tla sireletsa basebelisi bohle ba litsela, kaha li tla fokotsa mathata a neng a bakoa ke tšubuhlellano ea sephethephethe le likotsi tse atileng libakeng tseo.

A boela a re morero ona o tla ntlafatsa litsela tse isang metseng e fapakaneng, le ho phahamisa bohahlauli le ho khothaletsa khohlo ea likhoebo.

Ho ea ka Letona Seetsa, morero o tla nka lilemo tse peli, 'me nakong eo ho tla ba le phetisetso ea litsebo, tlhahiso ea mesebetsi haholo-holo bakeng sa bacha, le ho matlafatsa sechaba.

H'a bua lebitsong la Morena oa Sehlooho oa Matsieng, Morena Lerotholi Seeiso, o lakalelitse morero katleho, a ipiletsa hore menyetla ea mesebetsi le likonteraka e ajoe ka toka, e le hore sechaba sa Maseru se une molemo.

Ka lehlakoreng la Makanselara a Sechaba, Gerald Spence oa MMC 06 o re morero ona o tla

thusa haholo ho sireletsa ba tsamaeang ka maoto, a hopotsa kamoo batho ba thatafalloang ke ho tšela tsela lipakeng tsa seemahale sa Moshoeshoel le Pioneer Mall. "Re leboha morero ona o tla boela o khabise toropo ea Maseru," ho boletse Spence. Chelete e ka bang M5Milione e se e tsetetsoe morerong ona bakeng sa meralo.

Ha morero ona o ne o hlalisoa nakong ea puso ea Tona-Kholo ea mehlang, Dr. Moeketsi Majoro, Basotho ba bangata ba ile ba o nyatsa, ba re ke morero o sa lokelang ha naha e tobane le mathata a mangata. Ba bang ba ne ba sa bone bohlokoa ba ho tsetela chelete e ngata litseleng tsa toropo.

Kajeno ha mechini e se e qalile mesebetsi, potso ha e sa lokela ho ba hore na morero o qaliloe ke mang. Potso e khohlo ke hore na o tla fetola bophelo ba Basotho?

Ho feta moo, morero ona o tsamaellana le leano la bobeli la naha la ntšetsopele (NSDP II), e totobatsang hore ntšetsopele ea meaho ea motheo ke senotlolo sa khohlo ea moruo, tlhahiso ea mesebetsi, khoebo le ho fokotsa bofuma. Ntle le litsela tse ntle, ho ba thata hore batseteli ba tle, likhoebo li hole kapa bohahlauli bo atlehe.



WIDE FORMAT PRINTING

We offer durable, affordable & quick turnaround wide format prints. We can provide multiple options for indoors and outdoor applications - as well as produce any size you can imagine

FOR YOUR FUTURE
WE CARE



Call or whats App: +266 28350815/
22350224/ 68078124 (Whats app)

BANNERS

SIGNS

POSTERS

PRINTS

Peete o loanela tšireletso ea Basotho



Nthabeleng Seitlheko

Morena oa Sehlooho oa Matšekheng, Morena Peete Lesaona Peete, o re 'Muso oa Lesotho o lokela ho sireletsa le ho loanela litokelo tsa Basotho ba tlahehang ba hlorisoa le ho tobana le mathata Afrika Boroa. O bo-

letse tse na lipuisanong tse ntseng li tsoelapele Holong ea Liboka ea 'Manthabiseng, ka la 1 Phupu monongoaha.

Morena Peete o boletse hore hajoale ha ho bonahale ho e-na le moralo o hlakileng, oa hore na Basotho ba ka khutlang Afrika Boroa ba tla thusoa joang hore ba phele le ho fumana menyetla ea mesebetsi Le-

sotho.

O itse hoa soabisa hore naha ha e e-s'o hlahise leano le hlakileng la ho amohele le ho tšehetsa sechaba sena, haholo ha Lesotho le tobane le phephetso ea khaello ea mesebetsi le tlala. Batho ba tlositsoe ke tlala, mesebetsi ha e eo, seo se ba qosa ho fata metsuntsunyane naheng ea boahelani.

O re ha ho utloahale karabo e hlakileng ea hore na ba khutlang ba tla phela joang. Ke nako ea hore Lesotho le bontše boikemelo le bokhoni ba ho sireletsa baahi ba lona." Ho boletse Morena Peete.

Ka lehlakoreng le leng Letona la Litaba tsa Machabeng Mohlomphehi Limpho Tau, o re 'muso o se o kentse taba ena lipuisanong tsa semmuso le Afrika Boroa. O hlalositse hore lekala la hae le sebetsa ka matla ho netefatsa hore litokelo le polokeho ea Basotho lia sireletsoa, ho sa natse hore ba tsoa sebakeng se fe. O boetse a re likamano lipakeng tsa Lesotho le Afrika Boroa li ikhethile ebile li hloka ho matlafatsoa ka lipuisano tse tsoelang pele.

Tau o itse ho bohloko hore Basotho ba bang ba fumanehe ba le maemong a tlokotsi. A re liketsahalo tse joalo ha lia lokela ho etsahala. O boetse o khothalelitse sechaba ho qoba lipolelo tse ka bakang pherekano mabapi le boipuso ba Lesotho. "Lesotho ke naha e ikemetseng e ileng

ea sireletsoa ke Morena Moshoeshoe I, ka hona re tšoanetse ho sireletsa seriti sa eona." Ho boletse Tau.

Letona la Khiri le Basebetsi Tšeliso Mokhosi o hlalositse hore 'muso o ntse o buisana le ba bohlong Afrika Boroa ho rarolla litaba tse amang Basotho ba sebet-sang naheng eo. Mokhosi o itse e 'ngoe ea lintho tse ntseng li shejoa ke ho nolofatsa litaba tsa tokomane ea tumello ea tšebetso, e le hore Basotho ba nang le litokomane tse nepahetseng ba tsoele pele ho sebetsa ka molao Afrika Boroa.

O re lekala la hae le ikemiselitse ho netefatsa hore litokelo tsa Basebetsi ba Basotho lia sireletsoa, le hore ba tsoele pele ho fumana menyetla ea mosebetsi ka seriti.

Letona la khoebo Mohlomphehi Motlatsi Maqelepo, o re boholo ba batho ba ntseng ba e tla hae, ba sebetsa lifemeng. Ba lokela ho hlahisa mesebetsi haholo ka lifeme tse fapakaneng. O re ba se ntse ba fereha bahoebi ba ntseng ba kokota ho tla kahar'a naha.



Mazenod Tailoring
Prepare good People for This Land

tailoring@mazenodprinting.co.ls

22 350 224
+266 50757585

Transforming your image
is our Passion

Readily available







'Litlaleho tsa lichelete li thusa sechaba'

Tšeliso Thakholi

Motsa maisi oa Morero oa Kholiso ea Likhoebo(CAFI) Monghali Chaba Mokuku, o re litlaleho tse hlakileng tsa lichelete tse bileng li nang le ponaletso li thusa sechaba haholo ho etsa liqeto tse nepahetseng ha se sebelisa lichelete. O buile tse-na thupelong ea matsatsi a mabeli ea baphalatsi ba litaba e neng e reretsoe ho ba hlabella ka litsebo tse nepahetseng litabeng tse amanang le moruo le ho tlaeha lichelete ka nepo e bileng Ntlo-Khoho ea CAFI, Maseru, mafelong a beke a sa tsoa feta. Thupelo ena e neng e kopanetsoe ke CAFI le Banka e Khoho ea Lesotho.

Mokuku o itse e boetse e reretsoe ho matlafatsa tsamaiso ea litlaleho tsa litaba tsa lichelete tse amanang le moruo li bile li fetela sechabeng li hlakile, le ho matlafatsa baphatlalatsi ka litaba tsa khoe-



bo le menyetla ea ho etsa matsete a lichelete. A re bophatlalatsi bo tsoanela ho matlafatsoa haholo, kaha bo atleha ho fihlela palo e ngata haholo ea

sechaba ho feta mafapha a mang a mangata.

A tiisa hore baphatlalatsi le CAFI joalokaha e le liitsi tsa boselebeti ba sechaba li na le boikarabello bo

bohoho, ba ho arolelana litsebo tsa moruo le maa-no a lichelete le sechaba sa Basotho. "Ke ka lebaka lena ho leng bohlokoa ho koetlisa mafapaha a

kang a bophatlalatsi a tšepetsoeng ho fetisetsa ho sechaba litaba tsa lichelete le moruo. Ka puo e nolofetseng eseng ka mantsoe a boima mol-emong oa o fetisetsa kutloisiso habonolo ho sechaba." A rialo.

A supa hore sepheo se sehoho sa CAFI se itšetlehile holima litšiea tse tharo tsa bohlokoa, e leng ho batalatsa mabala hore hobe bonolo kahar'a naha ea Lesotho ho tsamaisa khoebo, ho holisa likhoebo tse nyenyane tse ntseng li hola, tse mahareng le tse qalang kaha e le tsona tseo e leng mokokotlo oa naha.

Lebitsong la CBL Monghali Ephraim Moremoholo o itse litaba tsa moruo li bohlokoa haholo, kaha li bapala karolo e khoho bophelong ba motho ka mong ba letsatsi ka leng. A re litlaleho tsa moruo li hloka barupeli e le ho thusa hore li hlakele mahlakore ohle a sechaba.

Har'a lithuto tse ling tse ngata tsa bohlokoa tse fanong thupelong ena, ke ea Monghali Thabang Majoro ea faneng ka thuto mabapi le ho laola le ho fana ka matla ho likhoebo tse sebetsanang le ho amohelela le ho fana ka lichelete ho sechaba. A re ho latala Molao oa Litsi tsa Lichelete, libanka le likhoebo tsohle tse sebetsanang le lichelete li lokela ho ngolisoa le Banka e Khoho ea Lesotho. "Ke CBL feela e fanang ka mangolo ho libanka le liitsi tsohle tse fanang ka litšebeliso tsa lichelete ho li tsamaisa." O boletse joalo a bile a phaella ka hore ba etsa melao e li tsamaisang le ho li hlahloba khafetsa, ho bona hore li ntse li etsa tšebetso ea tsona ka tsela e nepahetseng.

A qetella ka hore ba boetse ba hlahlella likhoebo tse ntseng li hola ka malebela, hore na li ka tseba ho kalima lichelete libankeng ka tsela ea mofuta ofe."Re thusa likhoebo tsohle ho li isa moo li tla tseba ho kalima lichelete hore li tsebe ho holisa likhoebo. Re thusa hape le likoluoa. Re ele hloko hore lithuso tsa rona ha se tsa nako eohle, kaha ha re thusitse khoebo ea hao o tlameha hore o sebetse hore e hole e be le lihlahisoa tse eang 'marakeng.'" Ke eena eo.

27 350 562 / 57396597 (whatsApp)
bookcentre@mazenodprinting.co.ls

Malebela

Mantšatlala

Mophema

Sehloho sa lihehelaheli

Lipapali tsa Basotho

SEBOPEHO-PUO SA SESOTHO 1

SEBOPEHO-PUO SA SESOTHO 2

SCHOOL BOOKS

now available on the Akello Online Library!

Here's how to access them:

1. Download the Akello Reading App.
2. Search for the book you want.
3. Purchase or subscribe online.
4. Download the book

Enjoy reading offline anytime on the Akello App.

<https://library.akello.co/>



TSA KEREKE

Masolenyane boikhutsong

2025-2026 SELEMO A

SONTAHA SA 14 HAR'A SELEMO

Tšeliso Thakholi

Litho tsa Kopano ea Masolenyane a Kriste Morena tsa Deanary ea Mazenod li bile boikhutsong bo bulang selemo 'Mishoneng oa St. Peter Clever, Tšoeneng, ka la 26 ho isa la 28 Phupjane monongoaha. Boikhutsong bona litho

a fihla a ba fetola a ba etsa ntho e le 'ngoe.

"Mosebetsi oa bona ea e-ba ho bona hore ba phatlalatsa Evangeli ea Morena oa rona Jesu Kriste." O boletse joalo a bile a phaella ka hore le rona ha re bitsoa likopanong tsa rona tse fapakaneng re fihla re fetoha ntho e le 'ngoe, 'me re lebelletsoe hore re phelisane ka khotso le lerato e le hore re tle re tsebe ho etsa mosebetsi oa Morena Molimo. A khalema bakriste ka

Kholo ea Maseru, Mofumahali 'Mamotaung Moiloa o boletse hore morero o mohlolo oa boikhutso ba bona ke ho tla tsosolosa Kopano ea Masolenyane 'mishone oa St. Peter Clever, kaha hone ho bonahala ba ne ba se ba e-na le mokhathala.

"Re ile ra bona ho le bohlokoa hore re le bana ba bo bona ba Deanary ea Mazenod, re ke re tle re tlii'o ba nyolla meea, mohlomong ha ba bona bana ba bang ba tla ke ba boele ba



li ile tsa etsa mosebetsi oa boapostola oa ho etela bakuli metseng ea Tšoeneng, ho ba rapella hore ba fole kapele le ho ba fa limpho. Ho bile ha tšoa oa bakokoti ba 47 Sehlaleng sa 'Missa se neng se etelletsoe pele ke mong'a 'mishone, Fr. Ernest Pheko OMI, a tlatsitsoe ke Rameea oa Kopano ea Masolenyane boemong ba Deanary Fr. Clement Khobatha.

Khothatsong ea hae Fr. Khobatha, o bontšitse hore leha re bitsitsoe re fapane ka likopano tsa rona tsa Kereke, re fetoha ntho e le 'ngoe ha re qala re fihla kahare ho Kereke, kaha sepheo se seng seo re se tletseng, eleng ho tla etsa hore Evangeli ea Morena oa rona Jesu Kriste e tsejoe. A re Jesu Kriste o ile a bitsa baapostola ba babeli e leng; Moapostola Petrose le Paolosi ea Halalalang, 'me

matla hore ba felise litoantšano le mahloeo kahare ho likopano tsa bona, e le ho fana ka mehlala e metle ho ba sa kenang likopano.

A re joaloka Petrose le Paolosi le rona re litho tsa 'mele oa Jesu Kriste, 'me re lebeletsoe ho lahla tomoso ea khale, re fetohle hore e fetohle le ho lomosa bophelo ba rona metseng le metsaneng moo re phelang teng. A re Morena oa rona Jesu Kriste o re bitsa re ntse re le baetsalibe, 'me o lebelletse hore ha re se re le teng re amohetse pitso ea hae, re qale ho sokoloha ka ho phela bophelo bo bontšang hore e feela re le bana ba Morena Molimo. "Ka likopano tsa rona ka ho fapakaneng re bitsuoe ho tla re ntšetsa mosebetsi oa Morena Molimo pele." Ke eena eo.


Mongoli oa Kopano ea Masolenyane a Kriste Morena boemong ba Tikoloho e

holise Kopano hape." A rialo. A tiisa hore bohlokoa ba ho ba Lesolenyane ke ho thusa bana hore ba holelele tšabong le leratong la Morena Molimo. Bana ka linako tsohle ba hole ba tseba le ho tšaba Morena Molimo.

A ipiletsa ho batsoali ho leka ka ohle ho thusa bana hore ba holelele kahare ho Kereke ea Morena Molimo, kaha sena se tla ba tšabisa ho etsa lintho tse hlabisang lihlong bopheleng ba bona. "Re holisa bana linakong tse thata haholo tseo le Bible e seng e sa rutoe likolong, 'me ha ba hola ba tseba Melao ea Morena Molimo, ba tla tšaba ho etsa lintho tse hlabisang lihlong." Ke Moiloa eo.

Moprista oa 'mishone Fr. Ernest Pheko OMI o ile a koala boikhutso bona, ka ho leboha bohle ka kentseng letsoho ka litsela tse fapakaneng ho atlehisa boikhutso bona.

Zakaria 9:9-10
Pesalema 144
Ba-Roma 8:9.11-13
Matheus 11:25-30



Khothatso

Bonolo le boikokobetso

Lilemo tse makholo pele ho ho tla ha Kriste lefatšeng, moprofeta Zakaria a n'a re: "Khos'i ea hao ke eo, e-tla ho uena, ke ea ikokobetsang, ea palameng pokola. O tla felisa kariki tsa nto, lipere tsa nto le libetsa. O phatlalatsa lichaba khotso."

Mantsoe ana a moprofeta Zakaria a ile a makatsa batho ba a ulloang, hobane mehlang ea hae, mebuso e meng e matla e ne e tumme haholo ka mabotho a eona a maholo, le ka bahlabani ba eona ba rupetoeng hantle, ba neng ba sebelisa likariki le lipere tsa nto le libetsa tse tsoetseng pele haholo. 'Me ha ho ne ho buuo ka ho tla ha Messia, bohle ba ne ba nahana morena ea fetang a mang ka matla, morena ea nang le mabotho a managata, a bohale, likariki le lipere tsa nto, libetsa tse ngata; morena ea tla ripitla mebuso eohle e teng lefatšeng.

Empa Zakaria o bua ka Morena ea ikokobetsang, ea palameng pokola, ho e-na le ho palama kariki e kholo e huloang ke lipere tse ngata. O bua ka morena ea bonolo ea sa rateng nto, empa ea tla hloma khotso. E, ho joalo, litsela tsa Molimo ha se litsela tsa batho le mehpolo ea Molimo ha se mehpolo ea batho. Ka baka la bofokoli ba bona, batho ba beha tšepo ea bona linthong tse kholo, tse ngata, tse boima, tse matla, tse bonahalang, tsa bohalefi. Athe ea matla 'ohle, eo matla a hae a se nang moeli, eena o sebelisa ntho tse fokolang ka palo le ka matla, batho ba eisehang 'me ba ikokobetseng. Molimo o matla 'ohle ka boena; ha a hloke ho beha tšepo ea hae nthong tse ngata kapa tse kholo.

Thapelong ea hae eo re e balleng evangeling, Jesu o leboha Nt'ae ka morero ona oa hae o senoletsoeng bana ho e-na le ho senoleloa ba baholefi. Bonolo le boikokobetso ke eona tselo ea Molimo a sebensang ka eona.

Pele a re ruta tselo ea hae, o re bontšitse eona ka mehlala eohle ea bophelo ba hae. Ho e-na ho tsoalloa Jerusalem, ka tlung ea borena le ho khumamelo ke marena a amang, o khethile ho tsoalloa Bethlehema, lehang, le ho khumamelo ke balisa ba linku. O hlahlile e le ngoana, mariha, a sa tsejoe ke baholo ba sechaba. O hlahlile a se na kariki leha e le pere; ha a kena Jerusalem ka borena, a tlameha ho alima pokola eo e seng ea hae, a tsebe ho phethahatsa se ngotsoeng ke moprofeta Zakaria ka eena.

O n'a tsamaea ka maoto, a se na letho, a felehetsoa ke baapostola ba leshome le metso e 'meli, batho ba sa rutehang, a falla pakeng tsa masholu, a tharistsoe sefapanong. Lefu la hae sefapanong, e leng tholeho e phethehileng mahlong a batho, e bile tholeho ea hae, hobane o hlote esita le lona lefu ka ho tsoha bafung ka letsatsi la boraro.

Jesu o n'a bua kamehla ka 'muso oa hae, empa e le 'muso o se nang marena, matona kapa makhotla, leha e le masole. O n'a bua ka 'muso o thehiloeng holim'a motheo e sa uloisisoeng ke batho: bofumanehi, boikokobetso, boitelo, ho jara sefapano, tsoarelo ea libe, esita le ho rata lira. 'Muso oa hae e ne e se o lefatše lena emapa oa leholimo.

Khos'i ea rona, Molopolli oa rona, Morena oa rona Jesu Kriste, o ratile ho phela joalo, leha e le Mora oa Molimo, Molimo ka sebele. 'Me o rata hore re mo sale morao, re hate mehlangeng ea hae, re mo etsise. Thuto ena a e thata, hobane re batho, re tloaetse ho phela joaloka batho, ho nahana tsa lefatše joaloka ka batho, le ho bua joaloka batho, re itšellehile holim'a bokheleke, bohale le tšobotsi ea batho.

Ke thuto e thata hobane re tsoanetse ho sokoloha, e seng hanngoe empa ka tsatsi le leng le leng; re furalle e seng Satane, mesebetsi ea hae le likhaliso tsa hae feela, tse na tsohle tseo re tsebang hantle hore ke ntho tse mpe, empa re tsoanetse ho furalla esita le tseo re li talimang li le lefatšeng, tse kang bohale ba batho, matla a bona. Re li tholele, re li furalle, hobane tse na, leha li le ntle, ke tsa lefatše, 'me li ke tsa re tsoala molemo bakeng la bophelo bo sa feleng leholimong. Ehilile ho thata ho ba mokriste oa 'nete, ea sebelisang ntho tsa lefatše ka tekanyo, ea phelang lefatšeng, a ntse a lemoha hore habo ke leholimong, ea latelang Kriste nthong tsohle, ka boikokobetso, bofumanehi le boitelo.

Kriste eena o re khothatsa, o re: "Ijareleng joko ea ka, le tla fumants'a meea ea lona katholoho. Ruri joko ea ka e monate, 'me thoto ea ka e bobebe."

Ka mantsoe a mang, ho bonolo ho ba mokriste oa 'nete, ha re ka itlala ka Kriste, re inehela ho eena ka ho tla, re etsa ntho e le 'ngoe le eena 'me re lumella ho tsamaisa liketsahalo tsohle tsa bophelo ba rona. Bothata ke ha re rata ho sebelisa lefatše le Molimo ka nako e le 'ngoe. Jesu ka sebele o re bolella hore hase ntho e ka etshalang, re tsoanetse ho kheth pakeng tsa Molimo le Chelete, pakeng tsa Molimo le Lefatše.

Ho ho le joalo, a re ikopeleng matla a ho inehela ho Kriste, ho kena sekolong sa hae le ho fetoha batho ba bonolo 'me ba boikokobetso joaloka ka eena.

Lilemo tse makholo pele ho ho tla ha Kriste lefatšeng, moprofeta Zakaria a n'a re: "Khos'i ea hao ke eo, e-tla ho uena, ke ea ikokobetsang, ea palameng pokola. O tla felisa kariki tsa nto, lipere tsa nto le libetsa. O phatlalatsa lichaba khotso."

Mantsoe ana a moprofeta Zakaria a ile a makatsa batho ba a ulloang, hobane mehlang ea hae, mebuso e meng e matla e ne e tumme haholo ka mabotho a eona a maholo, le ka bahlabani ba eona ba rupetoeng hantle, ba neng ba sebelisa likariki le lipere tsa nto le libetsa tse tsoetseng pele haholo. 'Me ha ho ne ho buuo ka ho tla ha Messia, bohle ba ne ba nahana morena ea fetang a mang ka matla, morena ea nang le mabotho a managata, a bohale, likariki le lipere tsa nto, libetsa tse ngata; morena ea tla ripitla mebuso eohle e teng lefatšeng.

Empa Zakaria o bua ka Morena ea ikokobetsang, ea palameng pokola, ho e-na le ho palama kariki e kholo e huloang ke lipere tse ngata. O bua ka morena ea bonolo ea sa rateng nto, empa ea tla hloma khotso. E, ho joalo, litsela tsa Molimo ha se litsela tsa batho le mehpolo ea Molimo ha se mehpolo ea batho. Ka baka la bofokoli ba bona, batho ba beha tšepo ea bona linthong tse kholo, tse ngata, tse boima, tse matla, tse bonahalang, tsa bohalefi. Athe ea matla 'ohle, eo matla a hae a se nang moeli, eena o sebelisa ntho tse fokolang ka palo le ka matla, batho ba eisehang 'me ba ikokobetseng. Molimo o matla 'ohle ka boena; ha a hloke ho beha tšepo ea hae nthong tse ngata kapa tse kholo.

Thapelong ea hae eo re e balleng evangeling, Jesu o leboha Nt'ae ka morero ona oa hae o senoletsoeng bana ho e-na le ho senoleloa ba baholefi. Bonolo le boikokobetso ke eona tselo ea Molimo a sebensang ka eona.

Pele a re ruta tselo ea hae, o re bontšitse eona ka mehlala eohle ea bophelo ba hae. Ho e-na ho tsoalloa Jerusalem, ka tlung ea borena le ho khumamelo ke marena a amang, o khethile ho tsoalloa Bethlehema, lehang, le ho khumamelo ke balisa ba linku. O hlahlile e le ngoana, mariha, a sa tsejoe ke baholo ba sechaba. O hlahlile a se na kariki leha e le pere; ha a kena Jerusalem ka borena, a tlameha ho alima pokola eo e seng ea hae, a tsebe ho phethahatsa se ngotsoeng ke moprofeta Zakaria ka eena.

O n'a tsamaea ka maoto, a se na letho, a felehetsoa ke baapostola ba leshome le metso e 'meli, batho ba sa rutehang, a falla pakeng tsa masholu, a tharistsoe sefapanong. Lefu la hae sefapanong, e leng tholeho e phethehileng mahlong a batho, e bile tholeho ea hae, hobane o hlote esita le lona lefu ka ho tsoha bafung ka letsatsi la boraro.

Jesu o n'a bua kamehla ka 'muso oa hae, empa e le 'muso o se nang marena, matona kapa makhotla, leha e le masole. O n'a bua ka 'muso o thehiloeng holim'a motheo e sa uloisisoeng ke batho: bofumanehi, boikokobetso, boitelo, ho jara sefapano, tsoarelo ea libe, esita le ho rata lira. 'Muso oa hae e ne e se o lefatše lena emapa oa leholimo.

Khos'i ea rona, Molopolli oa rona, Morena oa rona Jesu Kriste, o ratile ho phela joalo, leha e le Mora oa Molimo, Molimo ka sebele. 'Me o rata hore re mo sale morao, re hate mehlangeng ea hae, re mo etsise. Thuto ena a e thata, hobane re batho, re tloaetse ho phela joaloka batho, ho nahana tsa lefatše joaloka ka batho, le ho bua joaloka batho, re itšellehile holim'a bokheleke, bohale le tšobotsi ea batho.

Ke thuto e thata hobane re tsoanetse ho sokoloha, e seng hanngoe empa ka tsatsi le leng le leng; re furalle e seng Satane, mesebetsi ea hae le likhaliso tsa hae feela, tse na tsohle tseo re tsebang hantle hore ke ntho tse mpe, empa re tsoanetse ho furalla esita le tseo re li talimang li le lefatšeng, tse kang bohale ba batho, matla a bona. Re li tholele, re li furalle, hobane tse na, leha li le ntle, ke tsa lefatše, 'me li ke tsa re tsoala molemo bakeng la bophelo bo sa feleng leholimong. Ehilile ho thata ho ba mokriste oa 'nete, ea sebelisang ntho tsa lefatše ka tekanyo, ea phelang lefatšeng, a ntse a lemoha hore habo ke leholimong, ea latelang Kriste nthong tsohle, ka boikokobetso, bofumanehi le boitelo.

Kriste eena o re khothatsa, o re: "Ijareleng joko ea ka, le tla fumants'a meea ea lona katholoho. Ruri joko ea ka e monate, 'me thoto ea ka e bobebe."

Ka mantsoe a mang, ho bonolo ho ba mokriste oa 'nete, ha re ka itlala ka Kriste, re inehela ho eena ka ho tla, re etsa ntho e le 'ngoe le eena 'me re lumella ho tsamaisa liketsahalo tsohle tsa bophelo ba rona. Bothata ke ha re rata ho sebelisa lefatše le Molimo ka nako e le 'ngoe. Jesu ka sebele o re bolella hore hase ntho e ka etshalang, re tsoanetse ho kheth pakeng tsa Molimo le Chelete, pakeng tsa Molimo le Lefatše.

Ho ho le joalo, a re ikopeleng matla a ho inehela ho Kriste, ho kena sekolong sa hae le ho fetoha batho ba bonolo 'me ba boikokobetso joaloka ka eena.

Bahalaleli har'a Beke

- 6 Phupu Noyala
- 7 Phupu Willibald
- 8 Phupu Grimbald
- 9 Phupu Godfrey
- 10 Phupu Etto
- 11 Phupu Olga

Komiti e ncha e fana ka tšepo

Tšeliso Thakholi

Komiti e ncha ea Mokhatlo oa Lesotho oa Papali ea Libaesekele(LCA) e fana ka tšepo e kholo ho mekhatlo ea libaesekele le ho barati le batšehetsi ba papali ena, hore e tlii'o sebetsa ka thata ho nyolla moo komiti ea khale e sileng teng, e le ho holisa le matlafatsa papali ena likolong le metseng le ho bona hore banana le basali ba itahlela ka setotsoana papaling ena.

Raliphatlatso oa komiti e ncha ea LCA, Liteboho Letlala 'China' ka moo ba mo reneketsang ka teng, o boletse hore ba tlii'o sebetsa ka thata haholo ho nyollala papali ena boemong bo holimo kahare ho naha. O re har'a e meng ea meralo eo ba tlii'o e kenya tšebetso ke ho bona hore basali le banana ba kena ka bongata papaling ena, tlasa lenane-thuto le reng, 'Eket-sa ka a le mong hape'. "Ka lenane-thuto lena mosali e mong le e mong o lokela hoba le ba bana bao a tlang ho ba koetlisa le ho ba ho-

hela hore ba kene papaling ena." A rialo.

A re sena ke linyane likhoho li sa tla, kaha ba tlii'o boela ba hlahloba le ho matlafatsa meralo e seng e ntse e le teng le ho e tlatsetse ka e mecha, e ntse e le ho bona hore papali ea libaesekele e'a hola kahare ho naha. E le ho phetha taba-tabelo ea bona e kholo nakong ena ea tšebetso ea bona ea lilemo tse 'ne ba lutse sa maratsoana, ke ho tla

boela ba eketsa lipalo tsa lipalami tsa libaesekele ka mekhahlelo e fapakaneng.

A re ba boetse ba tla sebetsa ka thata ho boela ba e ketsa lipalo tsa libapali boemong ba tikoloho le ba machaba, e le hore ba tsebe ho beha Naha ea Lesotho 'mapeng, nakong ea litholisano tsa machaba. A qetella ka ho ipiletsa ho barati le batšehetsi ba papali ea libaesekele le ho Basotho bohle ho tsoarana

ka matsoho le hoba ntho e le 'ngoe ho tšehetsa komiti ena ho fihlela meraro ea eona e metle. Ke ka tšehetso le tšebeliso 'moho feela komiti e ka fihlelang meralo eohle ea eona.

Komiti ena e sa tsoa khethoa holong ea liboka ea BEDCO, Maseru, ka la 28 Phupjane monongoaha ha e-ea fetoha haholo, kaha Molula-Setulo e mocha ke Agnes Selepe, Matlatsi oa hae ke eo e neng e le

Raliphatlatso komiting e tsoa feta e leng Malefane Morie, bana le sekheo sa mongoli, Motlatsi oa mongoli ke Ntsimane Masitha, Ramatlotlo ke Kutloano Lerata, ba boetse ha bana le Motsamaisi oa ba koetlisi. Athe Raliphatlatso ke Liteboho Letlala le Komishinara ea Lintlafatso kahare ho mokhatlo ke Phakamele Xingwana. Komiti ena e tlii'o sebetsa nako ea lilemo tse 'ne.



LeBA e tsoma talenta

hlopha tsa papali ea litebele literekeng, empa ba sena tsona likolong, "me ha re

a bona, ba ke ke la lula fatše ba phutha matsoho, empa ka se senyenyane seo ba

Tšeliso Thakholi

Mokhatlo oa Lesotho oa Papali ea Litebele(LeBA) o tsoile letšolo ho tsoma talenta le ho otlala bana lilemong tse tlaase. Sena se bonahe-tse ka Lebaleng la Setsoto, Maseru, ka Moqebelo oa la 27 Phupjane monongoaha, moo ba ileng ba thakhola ka kotleho e kholo ho sibolla talenta ea papali ea litebele baneng ba lilemo li robeli ho ea holimo.

H'a bua ka ho thakholo ha ketsahalo ena ea bohlokoa ea ho otlala bana lilemong tse tlaase, Raliphatlatso oa LeBA, Monghali Letšasa Taole o boletse hore mokhatlo oa habo o fumane ho le molemo ho tsoa letšolo la ho batla le ho lokisa libapali tsa ka moso tsa papali ea litebele, e le hore naha e tle e tsebe hoba le libapali tse matla tse ka tsebang ho qothisana lehlokoa le tsa linaha tse ling tsa machaba.

A re tšebetso ena eo ba seng ba e qalile ea ho bokella bana 'moho le ho ba tlosa literateng ho ba koet-



lisa nakong ena eo likolo li koetsoeng, e se e tla ba ntho eo ba tla e etsa ka linako tsohle, kaha ha e ba thuse feela ho holisa litalenta tsa bona, empa e boetse e ba qobisa lintho tse kotsi tse ka silafatsang bophelo ba bona ba sa le banyenyane lilemong.

A re ka thuso ea LSRC letšolo lena la bona la ho koetlisa bana ka papali ea litebele le se le tlii'o name-

la literekeng tse 'ne kahar'a naha, moo seterekeng ka seng ho tlang ho hloauoa likolo tseo ho tlang ho thehoa lihlopha tsa papali ea litebele. A etsa mohlala ka likolo tse kang tse Phamameng tsa Leqele le sa Lesotho tse seng li ntse li hloailoe moo ho seng ntse ho ena le lihlopha bakeng sa ho koetlisa bana.

A re pele ho letšolo lena bane ba ntse ba ena le li-

qala re ea likolong ke moo re bonang hore papali ea rona e tla hola le hore thusa hore re tsebe ho otlolla thupa e sa le metsi, kaha ha re ba suile ba sa le banyenyane phapang e tla ba kholo hobane ba tla hola papali ena e le maling ho bona."

A tiisa hore leha mokhatlo oa habo ona le qholotso ea tlhokahalo ea lithuso bakeng sa ho ntšetsa pele a mang a manane a bohlokoa

nang le sona ba tla etsa sohle se matleng a bona ho holisa papali ea litebele. "Papali ea litebele hae hloke motho ea phomolang e batla se papali se lulang se ikoetlisa ka mehla." O boletse joalo a bile a phethela ka ho ipiletsa ho bahoebi le ho batho bohle ba boithatelo bo botle ho etsa letsoho la monna molemong oa ho matlafatsa papali ea litebele kahare ho naha.

Mohope oa Lefatše o'a thatafala

Tšeliso Thakholi

Linaha tse 'ne tse kenyeletsang e le 'ngoe ea Afrika, tse kenetseng lipapali tsa Mohope oa Lefatše, li se li tsoile mokola papaling tsa tsona tsa ho qala tsa mokhahlelo oa tse 32 tse setseng, 'me leeto la tsona la ho ea fihla ho makhaola-khang le fihlile pheletsong. Afrika Boroa e se e tlabotsoe ke Canada ka 1-0, Brazil ea poqa Japan ka 2-1, Paraguay ea hlola Germany ka 4-1 thahong ea mekoko, ha Morocco eo e leng eona naha ea pele ea Afrika ho fetela mokhahlelong oa tse 16, e hlotse Netherlands 3-2 thahong ea mekoko.

Ka ho hlola papali ena Naha ea Canada eo eleng eona moamoheli oa baeti e tliil'o kopana le Morocco mokhahlelong oa tse 16 tse tlang ho thakhoha mafelong ana a beke. Tiholo ea Canada e bile nakong e ekelitsoeng ha mohlankana ea kotsi haholo oa Canada, Stephen Eustaquio, a ileng a hakisa bolo letanta, 'me

sethibathibane Ronwen William oa Afrika Boroa, o ile a utloa ka letšoele hore bolo se e le ka letanteng.

Haele tlhoho ea Morocco eona e etsahetse kamor'a hore lihlopha ka bobeli li bapale ka seahlolo sa 1-1, tsa ea nakong e ekelitsoeng ha se ke haeba le nko ho tsoa lemina! Ho fihlela li ba li ea thahong ea mekoko moo Mohamed Ouhbis a ileng

ile a hlaba oa boraro o ileng oa beha Naha ea Morocco mokhahlelong oa lihlopha tse 16.

Naha ea Morocco e qalile ho beha Afrika 'mapeng ka 1986 ha e ne e fihla ho tse 16 lipapaling tsa Mohope oa Lefatše tse neng li bapalloa Mexico. E ne e qete lipapali tsa eona tsa mokhahlelo oa pele e sa hloloa, 'me e bapetse ka 0-0 le Portland ea

fihla mokhahlelong oa mantšano ka ho shapuo ke West Germany ka thupa e bohloko ea 1-0.

Lipapali tsa Mohope oa Lefatše tse bileng Naheng ea Qatar ka 2022 Morocco ha e'a ka ea fihla ho lihlopha tse 16, empa e ile ea iketsetsa nalane le ho bontša hore ehlile ke naha e matla haholo ka ho hlola linaha tse neng li le kotsi

e qetele ho fetela lihlopheng tse 16 tsa Mohope oa Lefatše.

Ho sa le joalo linaha tsa Afrika tse setseng li tla bapala tjena: Ivory Coast vs Norway, DR Congo vs England, Mexico vs Ecuador, Portugal vs Croatia, Argentina vs Cape Verde, Australia vs Egypt, Switzerland vs Algeria, Colombia vs Ghana, United States vs



a hlaba mokoko oa pele, Soufiane Rahimi a hlaba oa bobeli ha Ismael Saibari a

hlola England le Portugal ka 3-1 ka tatellano, empa ea fihla ea thula thaba hae

haholo ka nako eo, e leng Spain le Portugal. E se e le lilemo tse 36 Morocco e ne

Bosnia-Herz. le Belgium vs Senegal. Ho tla cha khong! Ho sale molora!

Vodacom e tlotla libapali

Tšeliso Thakholi

Sehlopha sa Bolo ea Maoto sa Lijabatho 'Mahala' ea Morija, se ile sa amohela pampiri-chelete ea boleng ba M1Millione ho tsoa kampaning ea mehala ea Vodacom, kamor'a ho ba bompoli ba Liki e Kholo ea Vodacom ea selemo sa 2025/2026. Phano ena e bile moketeng o moholo oa ho tlotla baletsaphala, ba koetlisi le libapali le ho nehelana ka meputso ho lihlopha tsohle tsa Liki e Kholo o bileng Hoteleng ea Avani

Maseru, Maseru, mafelong a tsoa feta a beke.

Libapali tse ileng tsa abeloa limpho li hloauoe ho latela litebello tsa barati le batšehetsi ba bolo ea maoto selemong se fetileng sa lipapali. Kahar'a libapali, ho ne ho shebiloe bo-'mapalamorao, ba bapalang bohareng, lithibathibane, sebakali se senyenyane ka ho fetisisa, sebakali se ipabotseng sa liki le mohlaba-lintlha ea hloahloa.

Ke mona moo sebakali se hloahloa ebile e le mohlaba-lintlha oa bompoli ba Liki ba Lijabatho,



Jane Thabantšo a ileng a olla likhau ka tsela e ileng ea makatsa batho ba neng ba le teng moketeng oo. O ile a ikhapela khau ea ho ba sebakali se ipabotseng sa selemo, a boela a hapa khau ea sebakali se ileng sa khethoa ke libapali tse ling ka lebaka la papali ea sona e tsoileng matsoho le ho ba sebakali se hlabileng lintlha tse ngata selemong se fetileng sa lipapali. Jane o tlohile moo a iphumanetse chelete a kaalo ka M27,000.00.

Rethabile Mokokoane oa sehlopha sa Matlama a ikhapela khau ea ho ba 'mapala-morao ea hloahloa, a ikhapela chelete e kaalo ka M9,000.00, 'mapalahare ea hloahloa ea eba Jafta Sello oa Lifofane, ea ileng

a iphumanela M9,000.00. Haele sethibathibane se hloahloa e bile Leluma Mofoka oa Matlama ea ileng a hapa le khau ea ho ba sebakali se senyenyane sa liki, 'me a kiba-kiba ka kakaretso ea chelete e kaalo ka M23,000.00.

Ho tloha moo moletsaphala ea hloahloa e bile Retšelisitsoe Molise, motlatsi oa hae ea eba Lesupi Puputla bao bobeli ba ileng ba itsamaela ka mehope le chelete e kaalo ka M6,000.00 motho ka mong. Barati le batšehetsi ba bolo ea maoto ba thoholelitse kampani ea Vodacom ka ho kenya letsoho le toma ho tšehetsa bolo ea maoto.

Ba re ha se boikarabello

ba Vodacom feela ho hollisa le ho matlafatsa papali ea bolo ea maoto, empa e boetse ke ea batšehetsi bohle, likampani tse hoebang Lesotho le 'Muso oa Lesotho ka Lekala la Lipapali. "Mokete ho tsooa o itekang, e leng hore rona re le batšehetsi ke rona re lokelang ho qala pele ka ho holisa lihlopha tsa rona ka ho nka botho ba lihlopha." Ba rialo.

Ba re Naha ea Lesotho e sa le morao haholo papaling ea bolo ea maoto, 'me phephetso e kholo ea ho holisa papali ea bolo e ba tobile kaofela e le baahi ba Lesotho. Ba leboha Vodacom ka ho tšehetsa papali ea bolo Lesotho.

